



kat.komp.

40115

I

Aog. St. Dr.

P

pang.

Febl. 3174

Stanislai et Ireni Maria: Doctor Angelicus
in sui Ordinis Varsaviensis Basilica
pro rectoris laudatus.

DOCTOR
ANGELICVS,

In sui Ordinis Varſauienſi Ba-
ſilica

PRO ROSTRIS
LAVDATVS

A
P. STANISLAO à IESV MARIA,
Clericorum Paup: MATRIS DEI
SCHOL: PIARVM

SACERDOTE,

M. DC. LXIV,

Die vij Martij.



VARSAVIÆ

Typis ELERTIANIS.

Ipse palam faciet disciplinam do-
ctrinae suae, & in lege testamē-
ti Domini gloriabitur. Col-
laudabunt multi sapientiam e-
ius, & usque in saeculum non
delebitur. *Ecclesi. 39.*

Admodum Rēdo in Christo Patri,
P. A L B E R T O
G R A B I E C K I,

Sacrae Theologiae Magistro Priori Couue-
tus Varfauienſis, & Vicario Contratæ Ma-
zouiae Ordinis PRÆDicatorum, totiꝫ
Congregationi Varfauienſi

FRANCISCVS GRZYBOWSKI
officiosaſam venerationem



ISTO Tibi, Admodū Rēdo Pater,
uniuersoꝫ Tuo Conuentui Doctorem
Angelicum, eum ipsum, quem facun-
diae suae coloribus nuper in frequentissi-
mo Vestro, multorumꝫ Virorum Eruditissimorum con-
fessu ille adumbravit, cuius ego in Eloquentia Discipulum
me esse profiteor, & glorior. Nolebam enim, ut Vox
illa, quae omnium Auditorum gratissima sonuit in au-
ribus, momentanea tantum esset, non aeterna. Nolebam,
ut Angelici Doctoris, quantacunꝫ sit, laus interiret obli-

uionis

uionis sepulta tenebris; proinde hanc in lucem bonâ veniâ Authoris produxi, ut aeternum publico frueretur sole, Soli Theologorum consecrata Oratio. Quâ igitur beneuolentiâ ipsum Oratorem audistis, eadem ipsius Orationem, me procurante ad vestros ab auribus oculos venientem, ut suscipiatis, enixè rogo.

Admodum RR. PP. Vestrarum

Obsequijs addictissimus

FRANCISCUS GRZYBOWSKI
Auditor Eloquentiæ.
C. V.

DOCTOR ANGELICVS

Q Vanquam vestra me potius recre-
et, Eruditissimi Auditores, quam conturbet fre-
quentia, multumq; mihi animi accrescat confessû
vestrum ut selectissimum ita iucundissimum con-
tuenti; tamen rei pondus, quod precibus eorum,
qui rogando suauiter mandant, suscepit, me sic premit, ut, nisi
quâdam diuinâ virtute roboratus fuero, parùm absit, quin ei
succumbam. Tanta enim est, quod optimè nôtis, Angelici
Doctoris dignitas, tam innumerabilis virtutum copia, tam va-
stus laudum Oceanus; ut hic omnem Eloquentiæ vim, illa om-
nes Arithmeticæ calculos, dignitas non solum vberriam di-
ctionem, sed quamuis etiam subtilissimam contemplationem
exceedat. Quodsi ad eius scientiam, sapientiamq; quis acce-
dat, hîc ita se stupore abreptum sentiet, ut, quid primum, aut
vltimum, sit laudaturus, ignorare cogatur. Quid igitur mihi
faciendum est, aliquid omninò de laudibus nunquam satis lau-
dandi Viri, interq; Diuos sui Ordinis præcipui, dicere conanti?
Hoc, quod faciunt nonnulli: qui, cum solem irretoris oculis a-
spicere non possunt, manum illis opponunt, ut hac ratione vel
aliquam saltem luminis partem intueantur. Hoc ego prorsus
modo cum lucidissimo Doctorum Sole progrediar. Impotens
totam illius quâ Virtutis quâ sapientiæ lucem penetrare, vni-
cum tantum radium contemplantur; cum illi ab vniuerso sapi-
entum Senatu concordî omnium voto Angelici Doctoris titu-
lum iure merito esse concessum non exigui momenti rationibus
confirmabo. Peto à vobis, Eruditissimi Auditores; ut pro ve-
stra erga communem eruditorum Patronum deuotione, proq;
summâ Angelici Doctoris reuerentiâ, me non attentè solum,
sed

sed etiam beneuolē, audiat. Vestra enim beneuolentiā efficere debetis, ut & ego Prouinciæ susceptæ satisfaciam, & vos non nisi contentissimi amplissimum hunc confessum soluatis.

Nemini hoc dubium adferre potest, quod hominum indoles futura in cunis adhuc soleat apparere. Qualis quisque, imo & quis in ætate virili sit futurus, id infantia prima demonstrat. Sanè bono ingenio prædita Mater cum suo gremio tenerum fouet infantulum ex certis indicijs facilem instituere de Statu illius, actibus, exercitijs, functionibus coniecturam potest. Quodsi quædam ad naturæ impetum fuerint adiuncta prodigia, quis tunc hæc signa esse minimè fallacia certorum euentuum non iudicabit? Etenim quid elisi ab infante Hercule serpentes denotabant, quam futurum illius robur, quo erat vniuersum orbem à perniciosissimis monstris purgaturus? Quid in ore pueruli dormientis Pindari confecta ab apibus mella indicabant, quam mellisfluam illius facundiam, quæ huc usque suam Græciā nutrit, & oblectat? Quid repertæ in sinu pueri Marij septem aquilæ designabāt, quam septem illius cōsulatus, quos non minori cum populi Romæ gloriā, quam suā gessit? Veniamus ad Philippum nemini secundum ex Regibus, quæ filij magnitudine, quæ propriā Virtute. Impresserat is aliquando per somnium coniugis Olympiadis vtero sigillum formæ leonis insignitum; atque paulo post non vana illum somniasse probauit euentus, cum ei Olympias talem fuit enixa filium, qui suā magnanimitate quosuis leones antecessit. Non est hic prætereunda Atia celebris genere mulier, quæ per nocturnam quietem sensit olim sua viscera per sublime ferri, & in quæque terrarum spatia diffundi. Misterium non exiguum somnio interfuisse nati ex ea Cæsaris Augusti imperium, victoriæ, triumphi, gloria, demonstrarunt. Orbis enim totius dominatum, virtute duce, comite fortunā, assecutus, omnes in Romano Imperio sibi succedentes famā atque felicitate superauit. Illud verò prope ridiculum videri potest, quod spectati nominis scriptor, Fulgositius, de Britanna quadam Plebeij viri coniuge memoriæ posterorum tradidit recolendum. Visa hæc sibi fuit, cum clausis somnum

num caperet oculis, Lunam peperisse, quæ totum Britanniae Regnum ambiret simul, & illustraret. Quam somnij huius fuisse putatis veritatem? Nata fuit ex muliere hac puella, quæ successu temporis Alestuni Britannorum Regis celeberrimi Patrens extitit. Sed ne diutius extra septa vagemur, quis huic Sanctissimæ, apud quam verba facio, Familiæ, Eruditissimi Auditores, dedit originem? nonne is, qui priusquam ortus esset, in forma Euangelici scilicet canis, faciem, quam ore ferebat, vniuersum orbem visus erat Matri somnianti illuminare? Cui felicissimo somnio quam felix respondit euentus, videmus; cum à Sanctissimo Patriarcha Dominico, eiusque sequacibus Filijs quasuis orbis partes ac regiones quæ doctrinā, quæ virtutibus, quæ miraculis, videmus esse illustratas. Descendamus iam ad maximi Parentis maximum Filium, & aliquā certam rationem inquiramus, quæ luculenter ostendi possit, D. THOMAM Aquinatem in cunis adhuc suis Angelicum Doctorem fuisse designatum. Si faueris, Eruditissimi Auditores, nihil, quam hoc, facilius vobis demonstrabo. Occurrit enim mihi prodigium ultra naturam ascendens, non tamen ultra Thomæ virtutem progrediens, in istius infantia obseruatum. Quod tametsi omnibus vobis esse cognitum non dubito, repetam nihilominus breuissimè, quod melius animos vestros ad id mihi, quod proposui, concedendum disponam. Inuoluebat fortè tenellum Puellulum mollibus fasciis gerula, & videns aliquid chartulæ infantilibus digitis prementem, hanc, ut commodius plicatas manus posset constringere, volebat auferre. Infantulus autem non permittere, resistere, reluctari. Hinc vel ipsis calitibus iucundissimum certamen exortum est. Trahebat nutrix chartulam, infans retrahebat; petebat illa, renuebat hic; donec Mater in suppetias vocata delicijs suis Filiolum spoliavit. At victusne hac ratione est? nequaquam. Tãdiu fortissimo planctu maternum ferebat pectus, tãdiu amaris lachrymulis rubentes genas conspergebat; quamdiu præda illa ablata non restituebatur. Victa ergo Filioli ploratu genitrix, & inaudita chartulæ repetendæ constantiā in admirationem raptâ, ubi in hac

hac scriptam esse Archangeli ad MARIAM salutationem perlegit, pietate singulari perfusa Infantulo tradidit eiulanti. Vicisti, paruule Hercules, vicisti; sed ubi redditam abscondes prædam, quâ potes iterum spoliari? Infidâ nutrix est, tametsi pia mater; quod hæc restituit, illa rapiet amplius non redditura. Inuenit sapiens Infans pro suo Thesauro suum Scriniolum. Deglutit aurea verba, & in cordis arcano sinu concludit. Hic mihi iam prodigiosam rem explicare liceat, Eruditissimi Auditores. Et tangam fortassis hanc acu, si dixerò, niueum chartulæ illius candorem atris distinctum notis non aliud, quam huius Sanctissimæ Familiæ, cui postea nomen daturus erat, religiosum habitum, quo fuerat induendus, significasse. Verumtamen Angelicæ Salutationis verba plûs mysterij, quàm tûm cogitari poterat, vel diuinari, continebant. Denotabant nimirum, Angelicum fore aliquando Doctorem eum, qui Infans nondum mandere sciens Angeli Salutationem mysterijs plenam deglutisset. Quâ probas id, dicet aliquis, ratione? Sacrarum literarum auctoritate. Decreuerat æterna mens Ezechielem futurorum scientiâ implere, non tamen eam homini deuoto supernaturaliter infudit; sed quodammodo Naturæ se se accommodans volumen illi obtulit deuorandum, vt hoc vatis viscera, scientiâ caput, replerentur. Fecit, quod erat iussus Ezechiel, sumptoq; & absûpto volumine, multas, præclaras, & admirandas res Propheticâ voce enunciauit. Redite nunc ad D. Aquinatem, Eruditissimi Auditores; & negate, si tamen potestis, eum tunc, cum Archangeli Salutationem deuorasset, Angelicum Doctorem fuisse inauguratum. Pro me diuini codicis pugnat authoritas, pugnat saltem non improbabilis opinio, pugnat ratio euidentissima. Quæ, nè fortè magis ingeniosa, quàm fortis esse videatur, adducam alia in subsidium argumenta, quibus, vt incæpi, Angelici Doctoris titulum Soli Theologorum confirmabo. Primum ad se rapit Angelica Virtus orationem, quâ tantum excelluit, vt Angelus corpore vestitus non immerito dici posset. Palumbes olim, auis continentissima, apud veteres symbolum Castitatis erat. Hanc etiam pictæ apes apud eodẽ

eodẽ repræsentabant, quas omninò hoc sine sapientes Poëtæ Virgineas volucres appellauerunt. Si verò quispiam Christianorum castimoniam, vero, & genuino symbolo adumbrare vellet, id profectò aptius, & conuenientiùs non faceret, quàm si D. THOMAM alatum depingi curaret. Omnes enim, quotquot diligentissimi custodes illibata Virginitatis existunt, omnes inquam terrestres Angeli non solâ tantum appellatione, sed ipsâ re sunt. Sicut autem inter Angelos magnæ differentiæ reperiuntur, sic inter homines dote castitatis insignitos. Nam ex his naturâ alij casti sunt, voto alij, aut proposito. Illi inter omnes laude maximâ eminent, qui supremo Numini consecratum puri animi lilium tam inuiolatum seruare satagunt, vt durissimas quasq; pugnas dirissimasque necesse malint subire, quàm diuinissimi floris odorem vel minimo stygij Boreæ flatu, non dicam disijci, sed attingi. Talem fuisse D. Aquinatem is tantum ignorare potest, qui, qualia pro tuenda castitate certamina peregerit, ignorat. Oppugnabat Mater castissimum Iuuenis integerrimi animum; restitit: oppugnabant fratres hîc vel maximè animosi milites; non cessit: oppugnabant sorores blandis rationibus, quòd armis nequirent; vt rupes immota stetit. Tandem vltimò expedita ad pugnam lupa venerat, armata venustiore formâ, cultiore mundo, suauiore facundiâ; totam deniq; stygem secum trahens ad subsidium. Quid hîc egit Christianus Athleta? Succubuit fortasse tot hostibus oppugnatus? minimè. Prædam tartareis apris, lilium cordis, concessit? nullo modo. Cohorruit saltem pavidus ad orci suppetias, aut vacillauit ad lenocinia fæminæ Syrenis? Imò verò se ipso Maior inflâmatâ Venerem flâmis aggressus, priùsquàm illius sensisset flâmas, expugnauit, fugauit, vicit. Silcat hîc ætas vetusta, nec âplius plenis buccis, sonorisq; buccinis suum Melanionem prædicet. Castus ille vt esse posset, hominû consortium auersatus in nemora secessit; sed quæ sine hoste Victoria? quæ sine victoria laus? Noster Melanion inter homines feris magis feros & integrum animum ab impura labe conseruauit, & celeberrimum triumphum de ipsa Venere reportauit.

rauit. Non amplius efferat vltra Sydera suum Scipionem Roma, quod oblatam insignis formæ puellam animi continentior repudiauit. Facile hoc potuit Romanus Imperator, cum non oppugnaretur. At noster Scipio, puritatis amantissimus, nec formæ cessit miraculo affini, nec toti Stygiæ vi palmam in Virtutis arena concessit. Non gloriatur Alexandro suo Macedonia, quod celebriorem de se ipso Victoriâ, quàm de Dario retulit, cum nullam ex captiuis mulieribus, tametsi Regiæ fuerint & egregiæ, insolenter attigit. Semel hoc Alexander ille præstitit, non semper. At noster Angelus, quouis Alexandro constantior, perpetuum sui victor extitit; nunquam corruptus, nunquam inquinatus. An igitur ipsi nomen Angelici Doctoris non approbamus, qui & Angelicam Virtutem sic Deo vouit, vt retineret; sic defendit, vt vinceret; & omnibus hac in arena dimicantibus eam profligandi hostis artem tradidit, quâ solâ ille profligari potest? Docuit nempe ignes ignibus vincere: docuit nihil magis, quàm flammâs, timere Venerem: docuit in tuenda castimonia constantiâ opus esse, constantiam hîc solam diademate redimiri. Quare cum illi tanquam Angelico luctatori baltheum Cælitæ obtulerunt, quo castos post pugnam quiescentis lumbos præcinxerunt; meritò & nos tanquam Angelicæ Virtutis propugnatori, & omnium hanc colere studentium infortiori, Angelici Doctoris lauream iure esse impositam fatebimur. Progrediamur à Virtute ad Sapientiam, à Castimonia ad Doctrinam: quæ cum omnino Angelica sit, Angelicum fecit Doctorem nostrum. Verum, nè tantum hoc dicamus, sed etiam probemus; quod in hanc rem argumenti afferro, obsecro, vt illud, quâ incæpistis humanitate, percipiat. Omne ego illud, Eruditissimi Auditores, opus esse Angelicum opinor, quodcunque naturæ ordinem, aut vires excedit, ac propterea miraculosum appellatur. Miramur ad preces bellicosi Ducis Iosue Solem suum cursum stitisse? Stitit hunc Angelus. Miramur trium dierum spatio in pænam Regiæ præsumptionis septuaginta milia Subditorum Dauidis fuisse perempta? Peremit Angelus.

Mira-

Miramur supra centum octoginta quinque millia in castris Assyriorum vnus decursu noctis fuisse cæsa? cecidit Angelus. Quis deinde iuniorem Thobiam ab immanis piscis deuoratione saluauit? Angelus. Quis eundem à crudelissimo orci satellite seruauit illasum? Angelus. Quis illius Patri lumen oculorum restituit? Angelus. Neque verò terribilis ille sessor, qui diuini inuasorem thesauri Heliodorum terræ allisit, alius quispiam fuit; præter Angelum: illi quoque duo Iuuenes, qui sacrilego raptori manus iniecerant, & sufficientes plagas inflixerant, non alij fuisse putandi sunt; quàm Angeli. Quid plura memorem? & diei lux, & vox linguæ me citius deficeret, quàm istius rei vel testimonia, vel exempla recenserem. Verbo dico, Angelica esse opera omnia, quæ miraculosa; miraculosa esse, quæ Angelica sunt. Atque hinc, si D. Т Н О М ꝥ doctrinam esse Angelicam velimus demonstrare, illud tantum nobis probandum restat, quòd ea *Miraculosa sit*. Et sanè est. Nam præter id, quòd eam vltra omnes humanæ diligentie vires acquisierit, hoc in ea maxime admirandum est, quòd ab vniuersis Doctoribus, Academicis, Concilijs, à tota demum Orthodoxâ Ecclesiâ probetur, ametur, colatur. Illicium quoddam Marci Tullij lingua habuisse putatur, quâ semper in suam sententiam cum Patres conscriptos, tum equites plebemque Romanam pertrahebat. Istiusmodi est D. Aquinatis doctrina, quam omnes Theologorum Scholæ, omnes Doctorum exedræ, si non passim sequuntur, saltem admirantur, stupent, venerantur. Atque sicut olim ad Delphici Apollinis oraculum totus orbis confluebat futura scitaturus, & tam euentus causarum, quàm causas euentuum indagaturus; sic & paulò ante elapsis, & modernis temporibus, vniuersa Christianitas istius sapientissimi Theologorum Phæbi, quasi templum quoddam sapientiæ, mirabili refertos doctrinæ libros accedit; in quibus quot legit conclusiones, tot oracula; quot sententias, tot responsa. Hac de ipsa re non minus eloquentissimus, quàm eruditissimus scriptorum oculus, luculentissimum exhibens testimonium: Т Н О М ꝥ, inquit, *sapientia adeo*

illustris, subtilis, atq; diuina; vt eam ingenia quamuis magna, quamuis acuta, quamuis felicia, mirentur, & obstupeſcant. Nihil eſt in omni Theologia adeo arduum, nihil in Philoſophia, tam difficile, implicitumq; ; quod ille non explicet: nihil adeo obſcurum, quod non ille declarat: nihil adeo reconditum inuolutumq; quod non eruat, & euoluat, & quidem methodo adeo Laconica, vt totidem videantur eſſe ſententiæ, quot verba; breuiuſq; periodis rem comprehendit omnem, ſuper quâ ceteri Doctorum ingentia volumina condidere. Illius porro doctrinæ claritas, diſtinctio, diſpoſitio, atq; connexio rerum adeo mirabilis eſt, vt corporeæ lucis inſtar eius doctrina non niſi lux eſſe videatur. Pergit vltra, vnicorni; ſanctiſſimum Doctorem conferens: *Simul*, ait, *unicornus* aquas ſuo cornu ſanat, cætera mox animalia veneni ſecura bibunt: ita quiſquis eſt Sancti Thomæ libris tanquam ſapientiæ fontibus potat, non eſt quod vllū virus erroris metuat. Quin & hæc ipſa Sapientiæ aqua, non tantummodo limpida, perſpicua, deſæcata, pura, bibentibuſq; ſalutifera eſt; ſed etiam aduerſus omne Virus Hæreſeos medicina. Cuius rei rationem afferens: *Omni* namq; Hæreſis, inquit, vel ab hoc Sancto Doctore reſutata fuit expreſſe, vel principiis fundamentiſq; irrefragabilibus ab eo relictis facile poſſit reſelli. Hoc ergo fortaiſſe diuinabat magni huius Doctoris magnus Magiſter Albertus, cum eum iſtiusmodi bouem eſſe diceret, cuius mugitum totus aliquando orbis eſſet auditurus. Quanquam appellâſſet rectius Oceanum ſcientiæ, ex quo tot flumina fonteſq; erumpentes ſanctam Dei Eccleſiam paſſim ſaluberrimis & vberriſimis documentis ſæcundarent; totq; Philoſophorum ac Theologorum irrigarent ingenia, vt vix cogitari queat, an aliquis doctrinam ſuam vel non ex Diui Thomæ fluentis promanare, vel non eius totam eſſe fateatur. Hoc ex Oceano ingentia illa Soariana flumina, ſuauiſſimi illi Opatouiani latices, dulciſſimæ illæ Philippi Gamachæi aquæ ortum traxerunt. Hoc ex Oceano quidquid vbiq; & purioris, & ſanioris doctrinæ, tanquam lymphæ contemplantur, & delibamus, fluxiſſe

xiſſe concedamus neceſſe eſt: Sed parum & ego dixi, cum ſapientiſſimum Doctorem Oceanum ſcientiæ appellauim. Tuba eſt hic, tuba illa Archangelica, admirabilis, efficax, tremenda. Nam quemadmodum ad fatalis illius tubæ vocem inaudito miraculo tam ex ſtygia palude, quàm ex piacularibus flammis, cæleſtibuſque domicilijs hominum omnium animæ progredientes in momento corporibus veſtiantur ſuis, & diuino Tribunali ſiſtentur; ita ad vocem Angelici Doctoris noſtri, totus excitatus, & excitus orbis implet diuerſa lectoria, ſalutariq; doctrinâ illius reformatus nouum aſſumit hominem, & per pium examen iudicium Numinis accedens inquirat in ſua ſpontē delicta, ſpontaneâ ſe mulctat pænâ, & tandem Angelus ex homine, Angelico Doctore cooperante, figuratur. Nimium, credo, Eruditifſimi Auditores, in hac parte probanda temporis conſumpſi; videorq; mihi Veſtram læſiſſe beneuolentiam, exacerbaſſe humanitatem. Quare propero ad finem, illud tantum pro cauſa firmitus roboranda adiiciens, quod Romanum oraculum de Aquinatis doctrinâ pronunciauit. Erat is Ioannes eius nominis viceſimus ſecundus Romanus Pontifex, qui cum Diuum hunc in album Diuorum referret, nullis opus eſſe, aiebat, ad eius ſanctimoniam confirmandam miraculis, quandoquidem tot per eum ſint patrata miracula, quot formata crothemata. Si igitur tam admiranda eſt illius doctrina, vt ſingulæ quæſtiones, ſingula dicantur eſſe prodigia, quis tandem eam neget eſſe Angelicam, atq; hæc ſimul de cauſâ meritò Angelici Doctoris titulo D: Aquinatem non adornet? Mihi ſanè rem profundius inſpicienti nimis exiguum videtur eſſe præmium tantæ Virtutis, tãtæq; Sapientiæ, titulus expoſitus, & confirmatus. Quamobrem pro ſupplemento noſtræ tenuitatis, appellemus Diuum hunc ex multorū ſententia Theologiæ florem, Philoſophiæ decus, Scientiarum ornamentum: appellemus Ingeniorum delictum, Religionis ſacrarium, Eccleſiæ fulcrum, Catholicæ fidei ſcutum: appellemus Hæreticorum malleum, Scholarum lucem, Theodidacton, qui biberit ex ipſo fonte diuinitatis: appellemus inſigne candecande-

candelabrum, Accensam facem; Virtutis, Sanctimonix, Scientixq; Iubar: appellemus Stellam splendidissimam, Vnionem nobilissimum, Thesaurum omnigenæ sapientix, Doctorum sanctissimum, doctissimum Sanctorum. Et tamen, cum eum sic ex-
rulerimus, cum tot tamq; præclaris elogijs decorauerimus,
adeo nihil æquale illi⁹ Virtuti ac Sapientix diximus;

vt mihi serio venia à vobis, Eruditissimi Auditores, petenda sit, quod in lectissimo vestro
sapientissimoq; confesso ad eum laudandum me resolverim, qui non nisi à
quopiam Doctore vel Oratore Angelico dignè laudari possit.

D I X I.

Angelicus meritò Doctor clamatur Aquinas.

Angelicum illius vinere, scireq; erat.

Angelica Virtutis amansq; tenaxq; probatur;

Angelicam purâ mente colebat Heram.

Angelicos mores habuit, caput, Anglicumq;

Cor; meritò Doctor, dicitur Angelicus.

F. G.



Imprimatur.

MATTHÆVS IAGODOWICZ I. V. D.
Protho-Notarius Apostolicus, Ecclesiæ
Cathedralis Płocensis & Collegiatarum
Varšauien: ac Pułtouiien: Canonicus,
Vicarius in Spiritualibus, & Officialis
Generalis Ducatus Masouiæ, Diœcesis
Poſnaniensis; Sacrarum Regiæ Reginalis-
que Maiestatum Secretarius.




BIBLIOTEKA UNIW.



JAGIELLOŃSKA

III. 11. 2.

Biblioteka Jagiellońska



stdr0014576

